

Peter-m Tugliat Tuyuutaiň

¹ Uvanja Simon Peter. Savaktigigaanja uqqiraqtigipluňalu Jesus Christ-ňum. Tuyuqtuňa ukuniňa iňuňnun akuqtuiruanun akisuruamik ukpiqsriňigmik uvaptiktun nalaunnjaruaňhagun Agaayyutipta suli anniqsuqtipta Jesus Christ-ňum. ² İlitchuğisaiňaqsiuňtuq Agaayyun suli Jesus Ataniqput. Uvvatuq iluaqqutiqağitchi atqunaq qiniuiňňamiglu.

Agaayyutim Tuqluutaalu Piksraqtaaňalu

³ Agaayyutim pakmakňaqtauruakun saňňiagun qaITCHIŇGAATIGUT supayaanik iňuutlasripluta agaayyutiqammaağılıkun tumigiplugu ilitchuqsrıňiptigun ilaňnik tuqluqtigikkaptiknik ilanjiutitqopluta kamanautmiňun nakuuniqsräuňgmiňunlu. ⁴ Tumigipluginik tamatkuak qaITCHIGAATIGUT kamanallapiaqtuanik akisuruaniq akiqsrüutinik. Ukpıigigupsigik akiqsrüutit annatlasrigisirusri qaayuňnaqtuamiň ittuamiň nunami iňuich kaňgruaqtanjisigun, aasrii piqatautlasrilusri Agaayyutim irrusriani ilaatin ililusri. ⁵ Tamanna pisigelugu pisuqtilaapsitňi illatigisriňukpiqsriňlapsitňun nakuuňiq, suli nakuuňiq tapiğlugu ilitchuğimmaağılıgigmik, ⁶ suli ilitchuğimmaağılıq tapiğlugu iňmun aňjalalgulığigmik, iňmun aňjalalgulığiq tapiğlugu anuqsrulığigmik, anuqsrulığiq tapiğlugu agaayyutiqammaağılıgigmik, ⁷ suli agaayyutiqammaağılıq tapiğlugu piqpaksriňigmik aniqatinik, suli piqpaksriňiq

aniqatinik tapiğlugu piçpaktamik iñupayaanun.
8 Tamarra taatnatchich irrusriksrat pigiraksrasi. Pigigupsiginj nausaiñaqtusri taapkunuuna, imailaatum ingitchusri asrirringitchuatunlu, aasriiñ ilitchuqsrisaiñaqtusri Atannaptiknik Jesus Christ-mik. **9** Aglaan kiñapayaaq iñuk piqangiññigumi tamatkuniña irrusriksranik irigiitchuq qiñitlaitluni. Puuyuqmigaa salummakkautilaani killuqsautıgruağmiñiñ.
10 Taatniitman, aniqatiumaañ, sakuugitchi pisuqtillaagusri tuqlukkauqliqsi piksraqtaaŋjuqliqsiñ nalupqinaiqqsillugu, atakkii taatna piyupsi paasraağumiñaitchusri. **11** Suli akuqtuigisirusri kamanaqtuamik pağlatmik isiğupsi isruitchuamun añaayuqautaanun atannapta anniqsuqtiptalu Jesus Christ.

12 Taatnaqļuña itqautisraigatağıpsi tamatkuniña, ilisimagaluağısiunniiñ payaŋaiğvigipluginlu Agaayutim ilumutuuruaña pakma pigikkaqsi. **13** Nalaunŋaruağigiga iñuuniqtutilamni maani nunami itqaqtitağukhusri sunik tamatkuniña. **14** Ilisimagiga timikułiksraigma tikitchaqtuuralla. Taatna atannapta Jesus Christ-ŋum nalupqinaiqļugu uqautigaaña. **15** Aglaan sakuugutiginiağitka ilipsitňun itqağıtquplugich tamatkua ataramik tuquanikkaluağuma.

Christ-ŋum Kamanautaa suli Sivuniksriqutauruaq

16 Quliaqtuaağutingritchipsi unipchaalianisigun iñuich ilitchuğipkaisaqpta aggiğñiałhanik Atannapta Jesus Christ kamanaqtuakun saŋŋiipauraağmigun. Uvagut qiñillapiaqsimagikput

kamanaqtuaq qaummaġinjñiha. ¹⁷ Nayuutirugut akuqtuipman Agaayyutmiñ Aapauruamiñ kamakkutmik kamanautmiglu, taavruma nipim nipliutipmagu kamanagñiqsrauruam supayaaniñ nipliqlihuni, “Tarrataamna piqpagikkaga Igñiga quyalimaaqtigillapiakkaġa.” ¹⁸ Aasrii taimani tusraagikput taamna nipi nipliqlihsaq qiläñmiñ piqatigiplugu Jesus iñgimi taivrumani Agaayyutim sagviqmagu kamanautni. ¹⁹ Uvaguttuuq nalupqisruutig-ingipsaġikput uqautigikkajat Agaayyutim sivuniksriqirinisa iñjlgaanimma. Pillautaqtusri naalaġnitqiägikkupsigin uqałħich, takku uqałliniħiħ kanjiqsipkaġaasri aggitqiññaqtilaanjanik Jesus-ñum atriplugu nangum qaumapkaiħha taaqtuaq ini qausraġatägnijanunaglaan uvlum suli nuilġataġnijanunaglaan uvluġiajan uvlaam. ²⁰ Sivulliulugu ilitchuġiraksraqsi uvva, sivuniksriqirim iñmiktuiñaq kanjiqsipkaġumiñaitħħaa sivuniksriqitauruaq Agaayyutim uqałħaniñ. ²¹ Atakkii iñuich sivuniksriqinqitchut sumiunniiñ pisułiġmiktigun, aglaan Agaayyun uqaġniqsut iñużmigun anjalatkaqsipmatiñ Ipqitchuam Irrutchim.

2

Ilısautrit Tañiġiħlaakun

¹ Iñjlgaanimma tañiġiħlaakun sivuniksriqirit iñukpalligñihsut akunġatni iñuich [Israel-mil]; taatnatun tañiġiħlaakun il-lısautrit iñukpalligñiaqmiut akunnapsitni. Tikiutriñiaqtut nalunautchiħiutin tañiġiħlaanik il-lısauttuttinik suksraunġiuta yumiñaqtu anik, piilaġi luġuunniñ

Atanguruaq tuquruaq annautisukługich. Aasrii pisigiplugu piłaaqałhat Ataniğmik taimmaiñaq piyaqqukkauniaqtut. ² Suli iñugiallapiaqtuat piqasriqsuutigisirut piginillapiaqtuatigun kanjunaqhutiñ iñuuniałhatigun, aasrii iñuñun uqamaqluutigipkaaqsilugu ilumutuuruuaq pisigiplugich ilinjich. ³ Pitlatułığmiktigun maniññaqniağıvgigisigaasri, ilisautilusri uqau-tilusriłu ilumutuungitchuanik. Agaayyutim atanniqsuirinata pasriñigai taimakħaaglaan, aasriiñ siñiktuangitchuq piyaqqulħiñaaġuqługich ilinjich.

⁴ Takku israġulgich killuqsaqmata Agaayyutim anasriñjuqsaqmigai igitlugich naglikasaġviñmun qiliqsruiplugillu taagħniqsrami tikiññiaħanunagħlaan uvluan atanniuviksram. ⁵ Suli Agaayyutim piyaqquqmigai iñuich iñuuruat taimani uvluñiñi Noah-m, ipipkaqlugich agaayyutaitchuat nunami uliqpañmun kamanaqtuamun. Noah quliaqtuaġaqtuq iñuñun nalaunħasriruksrauniplugich sivuġaani Agaayyutim, aasriiļi Agaayyutim annautigai Noah-lu tallimat malġuk iñuillu. ⁶ Suli Agaayyutim patchisiquitinigai iluqaisa iñuich iñuuruat nunaqqiċċapañni Sodom-miļu Gomorrah-miļu, aasriiñ ağralipkaġataqługik iknikun. Taavrumuuna Agaayyun urriqsuutiqaġniqsuq qanuq suksraunġigħiaqtilaanatnik iluqaitnīk agaayyutailaananik. ⁷ Suli Agaayyutim annautipmigaa nalaunħaruaq Lot, qinupkakkauruaq atqunaq qaayuġnaqtuakun iñuuniałhatigun killuliqirit iñuich. ⁸ Atakkii taamna nalaunħaruaq iñuk iñuuniaqami akunġatni

tamatkua killiqiruat iñuich uvluğagipman, iluilliuqtitauruq qiniqlugillu tusraaplugillu pigiitchuat savaaŋich. ⁹ Taatnaqhuni Atangum ilisimagaa qanuq annautriŋiksranı agaayyutiqaqtuanik uuktuağusriaŋitniň suli qanuq tigummiliksraŋat nalaunŋaitchuat iñuich uvluanunaglaan atanniuviksram anasriňjuqsağviksraŋatnun. ¹⁰ Agaayyutim anasriňjuqsağisiňigai suvaluk tamatkua iñuich anjalatağıpkaqtuat timim kimmutiğruaŋiňun qaayuğnaqtuanunlu, suli suksraqanğitchuat Agaayyutim anjalatchisaanik. Tamatkua ilisautrit taŋjilaakun aaŋjarut arguaŋaplutin. Sivuuğagingğitchaat uqamaqluutiqaliksraqtin qiniňgnaitchuanik saŋŋiqaqtuanik qilaŋmi. ¹¹ Israağulgıtunniiň kamanatluktuat saŋŋikun sayaktulikunlu tamatkunakňa uqamaqluutigitlaitchaich taapkua nayuqtigikkani Atanguruam. ¹² Aglaali tamatkua ilisautrit atriqaq-tut isrumatlailaatum niğrutitun, anjalatitautun aullasiğmiknun, aniruatun aŋuniagaksrauplutin tuqqutaksrauplutinlu. Uqağuurut pigiliplugich sunik kaŋiqsimanğisağmiknik. Aasrii piyaqquqgisirut isrumatlailaatum niğrutitun. ¹³ Taamna akiliusriağıgisigaat nagliksaaqsiupkailıgmiktigun atlanik iñuŋnik. Ilinjsa kimmutiği-raqigaat pisuliğruaqtin uvluğaluamiunniň. Kanŋusraağutaułhiňaqtut ilipsitňun niğiqataukamıň ilipsitňi, taqsraqtatun suli qilguliktun akunnapsitňi, quviasruutigiplugu ukpiq-saiļiqtiň. ¹⁴ Qiňiqamitruŋ ağınaq ikłitchakhutin sayuŋjayumarut nutqaummisilguitlugu taatnasriq killuqsaun. Ikłisaağıňaich pitchığiaqtuat iñuich

killuliqiliksrañatnun. Ilinjisa uummatinich anjalatiqañniqsut kaviuqtaułigmun. Ilinjich taiyuaniqluutikkaurut, suksraunğıqsağumaqtut. **15** Suksraaġnígaat nalaunñaruakuağiaq aasriiñ ulapnaaplutin. İñuuniagaqsirut iñuktun atiliktuñ Balaam iğñiña Bosor-m, piqpaksriruaq akiliutaanik killuliqiliħum. **16** Aglaan suakatakkauruq killuliqiliġmigun. Uqatlailaam natmaksiġvian nipliutiplugu iñuum nipaatum nutqaqtinniġaa sivuniksriqiri kinniqisaġaluaqtuaq. **17** Tamatkua ilisautrit atriqaqtut nivviatun imġilaamik suli tak-tugayauratun anjalatañatun anuqiġluum. Tamatkua iñuich Agaayyutim itqanaiyautiniġai iniksrañatnik taaqtuam taäġniqsrarjan iisruksraitchuami. **18** Ilinjich uqaqaminq nipayusriplutin uqaġaqtut sumun atuġumiñaiлаatigun. Ikħissaġuugaich pisugruaġutaagun timim pivaallħalikunlu tamatkua salummaqtitlutiñ annaqqammiqsuat tamatkunaknej killukun iñuuniąqtaquaniñ. **19** Ilinjisa akiqsrutuġuugaich iñuich atanniqsuqtik-sraiñiplugich ilinjich savaktaaġruuñjaġmiñ qaayuġnaqtuamun, atakkii iñuk anjalatittaqtuq qanusripayamun akiiliraġaqtimiñun. **20** Iñuich annaaniñniqsut qaayuġnautaitniñ nunam iñuiñ ilitchuqsriligmiktigun atannaptiknik Anniqsuqtiptiknigli Jesus Christ-mik. Uvvaami ilinjich illakkataaġutitqikkumiñ tamatkunuja akiilipkaġutiñlu, iisruksrañat pigiitlukkisiruq aullaġniiqqaġiġmikniñ. **21** Ilitchuġigaluaqqaqħluġu iñuuniāliq nalaunñaruakun, iluatlukkayaġniqsuq ilinjitiñ naluugaġumitruñ taamna iñuuniāliq uumaknej tunutchiżiġmikniñ ipqitchuamik

tillitmik qaisauruamik ilinjitñun. ²² Uvva atuumapkaǵaat taimña nipliutaumaruaq, “Qipmim uttaqiraǵigaa iñmi miǵiakkani,” suli “Kuniaq iǵǵuanikkajat utiǵaqtuq maǵǵaǵmun maǵǵiluktaǵiaqhuni.”

3

Akiqsruutaa Atanǵum Aggiǵñiałhan

¹ Piqpagikkamaań, ukua tuyuutit tugligigaich tuyuutma ilipsitñun. Taapkunjuuna tuyuutipkun itiqsaǵukkipsi itqaqtillugich tamatkua uqautigikkatka iñuuniaquplusri ipqitchuakun. ² Ilipsitñun itqaǵitqugitka sivuniksriqutauruat ipqitchuatigun sivuniksriqiritigun suli tillisauruat uvaptik-nun atannaptiknińlu anniqsuqtiptiknińlu uqqiraqtitigun. ³ Kanjiqsiraksraǵigaksi una sivulliulugu, mitautiksiruut tikitkisirut ilipsitñun aqulliǵñi uvluni aŋalatittuat pisulığruaǵmiknun. Mitautiginiagaraasri ⁴ uqaqhutin, “Jesus-ñum akiqsruutigigaa aggitqinńiałlı. Naamimi imma? Taimakńaqańa aapaavut [Christ-kun] tuqugaluaqtut, aglaan sua iluqani tamarra atlańjunǵitchuq aullaǵniılǵatałhanińaglaan nunam iñiqtaułhan.” ⁵ Aglaan itqaǵiyummataıllapiąǵaat una, Injlǵaan Agaayyutim iñigaa uqałhagun qılak suli nuna, aasrii nuna nunaǵuqlugu imiǵmiń suli imikun, ⁶ suli tamarrumuuna imikun nunaqqaaq piyaqquqlugu uliqpaktitlugu. ⁷ Taatnatuntuuq qılailļu nunalu pakma ittuat qaunaksriqaqtut Agaayyutim uqałhagun piyaqquǵníahananunaglaan iknígmun. Taimanigun uvluni Agaayyutim

atanniqsugisigai iñuich agaayyutaitchuat aasriiñ piyaqquglugich.

⁸ Aglaan piqpagikkamaaq, puuyuumanagu una, isrumaraqtugut atausriq uvluq pivikisilaajanik suli 1,000 ukiut pivikpauraqaqtilaanjanik, aglaan Ataniġmi atiruk.

⁹ Atangum sukaisaaġutigingħitchaa immiumas-raqamiuñ akiqsruutigikkani, iñuich ilanjich sukaiññiġiagħaluġaqta. Aglaan anuqsrutigaasri, atakkii piyummataġingħitchaa kiñaunniñ piyaqququqlugu, aglaan iluqaisa mumiqugħaluġai killuqsautmikniñ Agaayyutmun. ¹⁰ Aglaan uvlu Atanguruam tikitkisiruq niġiilautiluni aggħiżhatun tigħiex-niġiġaqtim. Taivrumani qīlaich piġgisirut qukiġnāqtuamik tusraġnaqħutiñ suli qaummatit qīlañmiittu siqumitkisirut iknikun suli nuna ikiniaqtuq supayaatlu nunamiittu. ¹¹ Iluqaġmin tamatkua sut piyaqqugħumaaqmata taatnatun, qanutchimigli iñuunia liqaqtuksrauniqpsi? Iñuuniaqtuksraurusri ipqillapiagħusri suli agaayyutikuagħusri supayaakun, ¹² utaqqilu Agaayyutim uvlu tikitħummaaqtuaq suli pisuqtillaapsitñi tikiumapkaġnagiägniaġlu taimħna uvluq. Taivrumani uvłumi iknigħum uunallapiaqtuam qīlaich piyaqqugħisigai suli qaummatit aukkisigai. ¹³ Aglaan utaqqigivut Agaayyutim akiqsruutigikkajji, itnaami, niġiugaqqaqtugut nutaanik qīlañnik suli nutaamik nunamik iñuuviksrajanatnik nalaunħasripkakkauplutiñ iñuich tupiksiruut Agaayyutmik.

¹⁴ Taatnamik piqpagikkamaaq, utaqqisiuñ taamna uvluq. Pisuqtillaapsitñi iñuuniagħitchi

taqsraqtaiļaakun puyyılıuktautaiļaakun sivugaani Agaayyutim suli qıñuiññakun. ¹⁵ Isrummatigisiuñ anuqsrullapiaļha atannapta kaņiqsimalugu anniqsuquriļha uvaptiknik. Taatnatuntuuq piq-pagiplugu aniqatiupta Paul-ŋum aglakmigaasri puqiutikun Agaayyutim qaisanlagun. ¹⁶ Iluqarjitiñ tuyuqtuutmiñi uqautigipmigai tamatkua sut. Uqanjiñ iļanich kaņiqsilgunaitchaluqaqtut. Aasriiñ iňuich naluruat payańaiqsimaitchuatl qipititchiñiqsut Paul-ŋum tuyuqtuutaiñik suliunniñ atlanik uqałhiñik Agaayyutim. Taamna pisigiplugu Agaayyutim piyaqqugniágai.

¹⁷ Ilipsiasriiñ piqpagikkamaaŋ, tamatkua sut ilitchugikkasri sivuani qaunatqiağıksigik. Taatnanǵitchupsi sivullikkauviaqmiusri killukuaǵutiñisigun maliǵutchiñǵitchuat. Aasriili qaunagiyumagiksi paallangıǵlıksraqsi payańaiqsimmavigikkapsitñiñ. ¹⁸ Aglaan nausraiňaǵitchi iluaqqutrisaagun ilitchugimmaǵiksisiainäglugu Ataniqput anniq-suqtigikkaqputlu Jesus Christ. Ilaanun illi kamanauň pakma suli qanjavak taimuňa. Taatnatatuq.

Ipqitchuat Makpiġaat - Agaayyutim Uqałhi

Inupiatun

The New Testament in Northwest Alaska Eskimo

copyright © 2010 Wycliffe Bible Translators, Inc.

Language: Inupiatun, Northwest Alaska (Northwest Alaska Eskimo)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files
dated 9 Oct 2020

46cece15-9127-50b3-bf07-88a1082e7ab6